

錢文敏公全集

詩以言志志之所在自然呈露如形聲之於影響不能
自已者春秋列國名卿各賦詩見志唐節度使崔鉉年
十五父執韓晉公滉命賦架上鷓鴣聲呈一絕滉大
喜曰他日位當與我埒李公垂諸生時識者見其闕農
詩驚嘆曰此人後來必爲宰相稼軒於乙丑登第後口
占一律云深居判乞過春殘墨漬青衫尙未乾曉日忽
開三里霧輕舟竟上九重灘平生溫飽何求足舉世聲
名欲稱難更有舊交司戶在十分春色厚顏看後數日
同諸生來謁問就中孰能詩稼軒退卽取詩本就正予
讀至是作卽批云孝廉登上第無一毫自滿意他日享
盛名都厚福詩其左券耶旣奉

旨內廷行走稼軒與予同直觚稜每

御製詩成得手錄恭讀予愧衰鈍未能成誦稼軒心手
靈敏已默識神會矣自是詩境愈上而詩亦日富予抱
疾旋里兒子汝誠亦同直

禁籟嘉辰勝地隨

輦矢音與稼軒師資切劘無虛日辛巳冬予以祝

釐入朝蒙

恩仍許

內直同事諸老宿頗稱稼軒詩學精進予笑語諸老曰
篠簜竹箭成材克貢見者皆曰是東南之美也予於其
初萌時若藹若蘆菲卽指之曰是可爲矢爲幹也予固

自知予言之不妄許人也抑予又觀於水源之深者流必長河源發崑崙凡九折而歸於海不知歷幾千里而後澗物至莫可以涯涘計今稼軒未五十遭際

明盛出則皇華四牡名山大浸供登涉而益神智者正不可測識入則濡染

天藻接鈞韶之響屬星斗之光視昔人所云讀萬卷書行萬里路者殆又進焉甲申夏五稼軒督學吾浙周歷既遍少休息於武林行解予適至出二十年來所爲詩二三冊愛其詩境清越竒拔固得江山之助居多亦真緝夙具乃致此耶因憶疇昔初遇時批答之語并其卷爲詩家公案云時乾隆乙酉仲秋上澣香樹居士陳羣

手稿

家傳

弟維喬撰

公諱維城字宗磐一字稼軒晚自號茶山先大夫長子也生而凝重長身戍削目炯炯有光總角讀書日千餘言通大義先大夫令浙江家甚貧吾母吳太夫人織紵以給公自塾歸飯太夫人買肉啖之而自蔬食公恒弗忍啖十歲能爲詩十二三歲爲騷賦古文斐然可觀丁巳侍先大夫遊京師負笈宜興任先生翔門篝燈卒業雞鳴乃罷比舍侍御張公重光每夜開讀聲琅然異之詰旦過訪相與談論移晷大歎賞侍御故世執乃折輩行定交去明年就婚金氏其外舅之父蘊亭先生以工詩爲新城王文簡所稱公在甥館引爲忘年友有所作

輒曰錢郎云何是秋舉京兆試房考編修張公爲儀初
獲公卷以爲者宿置之魁及得名籍年甚少意頗不愜
同考某君曰若人吾稔知是嘗有天碧欲無山之句傳
誦口下者也張公乃喜當是時有某太史甚器公欲羅
致門下介所知達意公曰吾誠才太史自能得之設以
干競進是不才也何足重太史謝之卒不往壬戌應內
閣中書舍人試入選乙丑中進士 廷試第一人授翰
林院修撰年甫二十有六戊辰夏五月

上在圓明園有

旨召公至則試以瘡璣玉衡賦五月鳴蜩詩日中奉
命申時當納卷公振翰若飛文不加點日甫跌而就

樞禁大臣及宿衛之士皆驚卷入稱

旨賜克食自是

上稔知公才欲大用矣故事進士入詞垣者三年試之以定去留謂之散館公以鼎甲殿三等末

上頗疑之故親試焉方被

命時至宮門大學士傅公執公手爲整冠曰

上意不測勉之公笑曰某以一書生登上第豈有所營謀而得哉固倖獲耳今日之事予奪唯

聖意何慮焉遂入其器度如此己已擢右春坊右中允

充日講起居注官未幾入直南書房懋勤殿行

走旋擢翰林院侍讀學士丁丑擢工部右侍郎工部筦

寶源局炊冶所積歷久有餘銘若干吏密以白公叱之曰吾豈以貧故取官物耶辛巳調刑部右侍郎尋轉左侍郎公曉鬯律意善察獄情秋審燭治讞牘常竟夕不寐同官或偶異所見反覆辨讐輒手書千百言論之久皆以公言爲然嘗因修律例條其援引岐誤者三事奏之其一言律載殘毀人屍及棄水中者杖一百流三千里棄而不失減等嘗見登時殺死姦夫或格殺持杖拒捕罪人及臨時殺死竊刼盜賊愚民懼累多有蹈此轍者有司因其本罪勿論遂專治其移埋棄屍之罪是所殺爲罪人故得勿論而移棄此勿論之屍罪反流徒是爲本小末大果其情事實者宜歸本律不得以餘罪他

援失輕重之倫也其一言例於親屬殺姦分別登時與否罪視本夫加一等蓋指未嘗拒捕格鬪而言若一有拒格則無論親屬本夫皆當以罪人拒捕論義甚明也各省遇此或援擅殺論或直以鬪殺論甚者持杖拒捕之姦夫反以謀故鬪殺分擬是殺拒捕之姦反重於不拒捕矣蓋姦盜均爲罪人故殺之適相等其輕重俱在不拒捕不拒捕之分請將親屬殺姦非登時者悉視罪人不拒捕而擅殺律其拒捕則視罪人拒捕格殺律以此科斷則情法合一矣得

肯允行又嘗以事主殺賊之例特奏論之略曰夜無故入人家此民間殺賊本律也按例事主殺賊折傷以下

皆勿論故雖至死杖徒良以盜賊不得與良民論抵寬
良民所以嚴盜賊也臣竊見此案外省多引捕亡律照
罪人不拒捕擅殺論抵原其意以夜無故例分黑夜白
日而不言登時疑無以處拘執而殺者且律載竊盜臨
時拒捕及殺傷人者皆斬若棄財逃走事主追逐持金
刃拒傷事主照罪人拒捕絞竊盜既用罪人拒捕律事
主卽用罪人不拒捕律事若相當而不知非也棄財與
臨時有間故於應死之盜賊求其一綫可生今遂以原
盜賊者轉而苛事主可乎且捕役責在拘縛不拒捕卽
非難拘故擅毆且罪之事主勢在自救故唯已獲賊則
不得擅殺非官司輕於事主特以閑捕役耳今以竊盜

拒捕分棄財不棄財而事主殺賊視之夫棄財與否竊盜自知之事在倉卒豈能責人以先檢家財而後捕賊哉况乎有司逮人不必大無良故必持杖乃爲拒捕乃得格殺勿論事主殺賊則不然以賊盜多兇強事主多良善事主之他物或不如賊盜之手足今以手足拒毆爲不拒捕何以服事主何以爲鋤強扶弱且登時打死者杖徒拘執及不拒捕殺者絞則杖徒加一等卽絞失遞加之次非法也奏入奉

旨大學士九卿議奏頗見施行壬午秋奉

命視學浙江浙東西爲人文藪然士子工揣摩實學者少公以爲士先立行文章浮薄卽行之徵也於是嚴扃

鑰慎校試浮靡者黜之根柢者拔之飭諸生以半年習
一經責成學博董之於按試時親爲核驗逾年士習蒸
然一變乙酉例當選士貢太學有學優而貌癯者或疑
之公曰取士豈以貌耶卒以應選丙戌滿歲還朝已
丑貴州威寧州知州劉標以銅鉛厥虧帑聞

上命公偕湖廣總督吳公達善內閣學士富公察善往
會讞富公已先往公陛辭晝夜馳閱二十一日遂抵
貴筑與兩公治之計虧官帑爲兩二十九萬三千有奇
事連大吏多所苞苴見知蔽匿各得實論奏如律是時
黔中讞獄踵起

上疊命公等訊治凡六案所涉不下數百人兩公皆以

公久任秋官虛懷推委公悉心鞠論不枉不滯各得其
平奏牘爰書悉出手定指爲之置案就畢而古州逆苗
香要之事起古州爲新闢苗疆生熟苗環境居香要者
黨堆寨熟苗性黠悍有邪術力能扼虎爲諸苗所憚有
老勇老九者羽翼之又黨根寨女苗迫根自言能食銀
鐵四人者聚而謀不軌庚寅春三月某日香要衣蟒衣
與迫根踞上坐老勇老九旁坐椎牛饗羣苗衆羅拜以
次呼爲王轉相煽誘其旁二十一寨皆響應遂傳木刻
將以五月十五日襲取下江營木刻者苗人所以期信
者也理苗同知龔學海聞其製鏢鎗繕柵茨也遣土舍
楊育林等往偵之旣至寨香要知事且洩卽帳中拔刀

殺偵者十一人學海告變公等既具奏卽偕巡撫宮公兆麟倍道馳古州檄調兵一千四百人赴援香要先期以十三日率其衆千餘人攻下江將自蘇洞渡河學海已盡拘舟楫北岸遂不得渡官軍阻水而陳礮擊之有死者薄莫甚雨香要乃麾衆退據烏牛寨二十日署古州鎮總兵程國相統兵進勦香要敗奔佳居寨二十二日公等親至下江營周覽形勢其東南界連廣西東北與湖南毗近西距古州城九十里南瀕大河名都江廣三十餘丈隔江崇山斗立林箐深密是爲烏牛寨苗中出入襟喉地也稍進則爲滾塘十二寨周遭百餘里人口數千戶而黨堆居其中公策之曰香要倉卒舉事不

得渡河無能爲也顧其脅從者衆地復險阻苗人急則并力緩則生疑若驟鼓行而前羣苗自謂必死壁山柵水以逆顏行勢非旬月可定待其破滅斬刈必多非天子神武不獲之意誠宜刊榜文譯苗語徧給諸寨諭以

天朝威德誅止亂者餘無所問則羣苗心安黨將離散香要特圈中孤豚耳佳居爲生苗旁近多其種落慮其輾轉勾結或成蔓延宜密遣人入其寨中令縛香要自效卽不遽從狐疑猜阻大兵卒至無暇合謀破之必矣兩公及宮公以爲然乃移文廣西湖廣督撫俾守相接要害所而潛令舊主舍萬忠由永從縣間道往討其至

日我兵當抵佳居復以兵百八十授副將柴榮春與之期令助國相進攻且斷苗後路國相以二十六日攻佳居香要拒敵衆頗洵懼遂奔潰擒迨根及餘黨數人閏五月二日公等乃嚴師備下江身率輕兵繼進先是熟苗聞招諭意頗感悟日持牛酒獻軍門公却其摯前其人曰若曹皆良苗能助順者有厚賚雖然若所重者木刻也果願盡力當於吾前面約信持示各寨乃不汝疑於是苗人立就樹削一木刻羣跪以請公乃解所佩刀予首者其餘給以銀牌鹽布各踊躍去旣渡河歷加溜等五寨達生苗境頭人有來謁者皆好言撫之生苗盡喜而前所遣萬忠者至佳居而寨適破乃與向所知苗

人勸誘旁若偵緝逆黨於是望風吐欵者踵相接矣國相之破佳居也以未用斷後命僅燒其營故香要得逸去公等乃具奏奪其職令自贖焉自烏牛寨至佳居八十里烏道峻折劣容一騎而加溜尤險隘乃留百人守之至佳居日莫衆以苗奔散頗易之公曰讎藪有毒不可弛也乃設軍號整壁壘厲卒以待朋論者佳居面南山也大箐叢惡延袤四十餘里夜半見炬火明滅緣崖而下少止復緣而上明日捕得生口云苗衆伏榛莽間度後隊兵寡將夜劫之覘有備乃退衆乃歎服公等於督將士分三路入山搜賊老勇老九及香要妻妾子女咸就縛當是時大兵駐佳居者二千人公慮羣苗無

知懼復有進勦意日事觀望失栽種之時無以資生且香要知大兵在匿影益密終不可得十五日乃下令旋師令叅將德光以兵四百移屯黨紐爲鎮撫計既至滾塘復退駐古州揚言卽日還京師示不復用兵於是生熟苗奔者悉返稍稍復業香要既棄妻子獨身竄山谷間聞諸寨得木刻皆欲捕已者勢窮蹙無可往乃匿烏招山中六月八日有外入者與之語香要覺其情遽拔刀起突一人持梃自後擊之踏遂反接以獻則公所募變服迹賊名管顯王應田者也首惡皆磔死凡戮五十二人而事定捷聞

上以苗人效順者衆宜示獎勵公等於是傳榜文悉名

諸苗至下江至之日大開營門諸將士擐甲侍列所賜
堂下宣布

天子盛德綏靖萬里雖在荒阻無所不愛諸苗悉下拜
稽顙其有田功不獲至者則又遣學海資賞賚莅黨紐
適中地與德光徧給之苗人無不大喜盡納其械器火
藥越數日生苗自加葉加鳴諸寨去古州數百里皆來
投誠皆曰沐

大皇帝天恩乃得安堵公等一一勞之如熟苗乃去所
駐黨紐兵者逾一月遂極歸內地不復屯

上嘉公等成功之速也以軍功下吏部議敘秋七月公
至京師奏學海掣舟事苗不得渡河實有功

上乃擢學海古州兵備道復奏丹江兵米宜行改折大指謂苗民所種多稻田出米甚廣利於採買若實運則苗民既失賣米之利官司復多輸挽之勞且黔省步步皆山運米一石價與買等是常以二易一也請自平越始凡歷年實運之處一體改折可以順苗情而節浮費得

旨報可三十六年春滇南之竜陵有逃卒四十八人省議援伊犁例一逃者枷示一月再者斬而以竜陵新邊地宜加創懲雖未及再擬正法公以爲過重且恐後遂爲例所殺實多會

名見因言罹法者衆駢首就戮情可憫且於就獲所斬

之邊兵何自知反不足戒不如仍械馳竈陵倍其罰枷示三月見者宜無不凜然

上是之趣傳

旨馳赦竟如所請行聞者以是舉所活數十人咸太息公之視學浙中也適先大夫遭疾不得洩便公奉械寄侍無倦色穢下必親視數月疾良已既還朝以陳情未遂寢饋恒不自適壬辰春遽聞先大夫訃擗踊馳歸至家臥苦由間以不及親侍疾時過慟出入惟依依太夫人側不少離素有消渴疾至是增劇體日羸十月吳門有弔者扁舟往謝天驟寒雨主人出素服請襲公視非衰疏弗受遂益感寒疾歸病革口授遺疏既而歎曰

吾不得待太夫人養矣遂卒時年五十有三歲公十餘齡時先大夫夢至神府聞大聲臚傳進士其第三公名也旁一吏曰是爲若子始公名辛來故字稼軒至是遂易之及後乃竟第一人釋褐七年遂階二品

上每謁

山陵

時巡方域公多扈從在秋官前後十年

上尤倚重之聞銜恤歸

上顧左右曰此好侍郎國家有用人也

上稔知公病消翼日

命王公際華就問且戒茗飲及遺疏入

上軫悼有

旨褒卹加贈尙書

諭祭葬

賜諡文敏公精繪事

上愛所作輒親題詩旣南歸病中作溪山平遠長卷以
進比達

御已得公函問

上歎視良久特命存之癸巳

御題公所進畫冊猶追念不置云前後拜

御筆詩畫及尙方服食之賚極多里居後

特頒淳化軒閣帖二部賜公未至而公卒巡撫以請

上仍命貯於家方爲工部時奉

命監五城平糶鄉民某挾錢來糶某甲者竊之某囊空
不得糶泣以告公卽廠所盡搜糶者甲已獲米而錢有
贏核之某所失數符詰之甲不服曰吾攜市他物耳公
乃拘二人而潛遣役至甲家紿之曰甲來糶失錢已有
攫之者得一言證其數則益信乃給米耳甲妻遂以若
干告役返甲乃服罪公之明決類如此公生平平易炳
白與人交不設城府好稱人之善獎借寒素口如不勝
然嚴毅不可干以私雖於公爲久故者終無所關說尤
重廉節未嘗以形勢取一錢直餽雖早貴而自處同寒
士食不兼味無妾媵之奉居室輿馬服玩之好好爲詩

以李世爲宗文章疏達淳茂絕去規仿書法似蘇文忠
畫得元四家之勝卓然成大家所著有詩文集三十卷
藏於家娶金氏子二人中銑中鈺女一人適進士南鄭
知縣崔龍見孫男二人女二人俱幼公屢司文衡爲鄉
會主考官各一爲殿試讀卷官者四及選拔浙江士所
取率多聞人掇高第登卿列者輩起得人稱極盛

余自髫齡與兄別蓋十年歲乙亥兄以乞假歸得見其
篋中詩稿數冊未能竟讀也又五年兄典江右試事畢
還家一旬因稍稍讀塞外所作及南來遊覽諸篇心竊
慕之每聯牀論詩輒過夜半蓋至是始怦怦然動也嗟
乎詩至今日作者夥矣百餘年來一二名公鉅卿類以
妃青媲白號爲風雅後起之士翕然宗之迄於今未衰
卽余何敢菲薄前人顧嘗取而誦焉於吾性情若未嘗
有所感觸洵乎嗜好不同非可強耳吾兄嘗曰吾非李
杜詩概不敢讀卽讀亦不甚愛夫詩之於人殆有天性
焉學焉而各獲所近誠未可一格論雖然昔人云取法
於上僅得乎中登泰山者俯見千里而身陟部婁目不

越數武則所係於學者之取舍又豈淺鮮哉今年春彙
其前後詩若干卷示余余惟初學謏陋非知言者抑嘗
有志於此而未逮聊識此以自勗云時乾隆甲申秋七
月弟維喬跋於台州試院

參閱姓氏

陳兆崙

星齋浙江錢塘人

齊召南

次風浙江天台人

寶光飛

東阜山東諸城人

張甄陶

惕菴江南桐城人

錢 載

坤一浙江秀水人

胡紹鼎

牧亭湖北孝感人

同里參閱姓氏

蔣和寧

用安

劉星煒

映榆

莊存與

方畊

趙翼

雲松

管幹珍

陽復

莊炘

似撰

管世銘

緘若

崔龍見

翹英

洪禮吉

穉存

趙懷玉

億生

莊述祖

葆琛

呂星垣

叔猛

鳴春小草目次

卷之一

古近體詩九十三首

卷之二

古近體詩一百六首

卷之三

古近體詩八十六首

卷之四

古近體詩七十六首

卷之五

古近體詩九十四首

卷之六

古近體詩一百六十二首

卷之七

古近體詩一百二十八首

鳴春小草卷之一

武進錢維城稼軒著

子中銑 中釘

奉

敕繪古中盤圖恭和

御製遊東甘澗古中盤諸勝卽景元韻

風傳田盤勝百里阻登眺圖經古所闕安識山中妙繪
圖祇

宸命休惕久未報呵毫苦率直怕作寒山峭何處宜長
林何處宜曲道潺湲幾曲澗登頓幾祠廟雲容非一姿

石態亦殊貌冥想猶鴻濛誰歟繫其竅地盤出內府
披歷悉未到親切指近峯依微示浮嶠恍如聚米觀又
如歷堂與悠然駕長風置身青崖隕潏懷溯真境直欲
啓蒙冒密林想增陰石磴期可造向背戒倒施錄黍必
勤較烟雲留供養先匠心所敦高唱有倪黃屬和難爲
調秋容聊點綴谷勢存隱耀真宰詎能窺山霧得毋笑
未協栖隱情復乖知仁樂真成畫蛇足杯酒不得醕何
期塵

睿鑒指示出意料

是圖草木進呈
指示改五松堂數處

上

高松變蚪盤深

殿藏竄篠一爲洗蒼茫頓覺露岩髮已知窮五技且得
專一好譬彼飛蓬首粉澤重施膏刻鵠幸免譏吹竽敢

忘誚 奎章題幘首赫赫初陽照更矢卷阿音清風見

周召

命臣汪由敦臣劉綸各題詩於末

小臣忝廁名摛藻忘體要

恭和蜀省豐收

示總督策楞

御製元韻

秋來九野盡豐年送喜還聞自劍川雪嶺春回成黍谷
蜀江風暖奏神筮定多夔女沽筒酒豈有巴人訟芋田
絕徼苗民俱食德

聖恩何處不遐宣

歌陳七德屢豐年千羽風和遍兩川赤甲山民休種芋
白狼夷女解調弦濯成紅錦敷烟井剪就黃雲被火田

只恐瘡痍猶未復

聖情仍自念旬宣

古有興師獲瑞年况今沃野是梁川一春早沛洗兵雨
三殿仍揮解慍弦蜀客漫誇渠口澤杜陵休羨粟亭田
要知頌漢歌成處不獨天威萬里宣

恭和

御製題生秋卷元韻

似有微颺葉底吹濛濛烟樹月斜時劇憐肅爽秋如許
不信蕭森氣最悲臺榭接天迷黯淡蒹葭極浦漾漣漪
好收涼意歸詩帙還藉清風答

睿思

恭和

御製包山奇石詩元韻

具區諸峯七十二烟鬟一一濃雲包中含地肺達井絡
上矗石骨凌斗霄幽岩往往聚奇石礧砢硃形凸凹
獅頭羊角極醜怪陰質黝黑陽昭昭卷雲折帶貌不得
牛毛空說黃山樵房羅乍似剖牡礪穴隙或可巢鴉鷄
鉛松不借青州貢橋柚堪補洞庭謠圖來突兀欲撐紙
靜對足可瀾塵器

恭和

御製咏玉鞞元韻

玉作鈎弦巧匠爲手柔弓燥恰相資圭璋正好稱觀德

鳴春小草

卷一

三

朱極多應誤疏詩一寸循來環似此三分損去瑄如茲
懸知弧矢親調處

王度羣欽式六師

恭和

御製平原行元韻

上客罷高宴請歌平原行平原賓客盛意氣玳筵珠履
當筵盈良夜斗酒會主人千金情一生肝胆盡相向握
手天日盟精誠平居盡作處囊客誰識碌碌因人成田
巴徐刼好雄辨飛兔萬里誰堪評抵掌談縱橫屠狗俱
豪英便欲南約楚還當西拒麤杯酒澆趙州慷慨流聲
稱獨有仲連長嘯赴東海手把瑤草和烟耕

恭和

御製雁元韻

歸信非關春信遲
冥冥雲路欲何之
偶來天上通文字
聊與人間譜歲時
斜日高空飛自穩
蘆花淺水宿相宜
稻粱恩重微軀在
惟解隨陽是鳳思

恭和

御製入江南境元韻

芒雲開處識江春
吳越霧祇解扈巡
山豁大河規澤國
天開平野盡農民
輕塵不動東風軟
細草初勻好雨頻
萬彙亦知邀

帝眷千村梅柳一時新

恭和

御製賜沈德潛元韻

十年通籍領司春歸去霧巖夙昔親雅頌力能酬

聖主湖山

恩許作閒人定知真訣求終得不獨初衣頌易陳多少
烟霞老詞客幽崖空自鎖松筠

恭和

御製題釣魚臺元韻

無端一飯困英雄垂見蘆中泣路窮草澤獨憐漂母惠
粉榆可惜大王風欲同呂望成開國輸與嚴光作釣翁
憑弔千秋邀

聖主恍聽鞀鼓念初終

恭和

御製初登金山得句元韻

洪流萬頃一螺青勢壓波濤變幻形石燕罷飛風雨靜
水犀休照鬼神靈江光隱隱樓頭動塔影依依雲外停
更上妙高臺上望

宸懷應快對空冥

恭和

御製遊金山寺用蘇東坡韻

長江奔騰到京口收攝餘怒趨東海凌濤谷轉多盤渦
砥柱中流此山在何年開闢裴頭陀結構佛閣臨滄波

雲雷鬱勃蟄戶底覆壓窟宅蛟螭多

巡方到此停桂楫昨夜波心浴紅日銜艦接軸環山周
繡旗明燈映天赤是時望後遲月魄海門三更破深黑
聖人求衣天未明望舒揚彩羲和驚須臾歌成世莫識
曩拓乾坤包萬物北固京峴皆名山對之不覺羞髡頑
東坡短唱慚曷已只作滔滔江上水

恭和

御製試中泠泉元韻

伯芻茶癖本自天吸盡幽溪絕澗天泉地眼同長川輕
清重濁別差次中泠最上推金山金山之泉有二說山
腰乳竇今名傳或云長繩倒下百千尺乃是上古第一

雲零泉巡方幾暇事幽討閒敲石火山薪然筠爐解眼
試初熟風生兩腋凌飛仙仙風吹袂茶烟起靜對松窗
落松子湛然虛室延白光默契義黃樂無比吁嗟帝臺
神漿曷過此可笑江南季卿強作解事人乃謂揚子江
心第七水

恭和

御製遊焦山作歌元韻

金山頂上看焦山一髮青螺近檐屋金山脚下趨焦山
半晌西風飽帆腹鏡光乍拭靈臺兄蒲牢不吼空中聲
儼然瀟蕩翻海水簸搖兩山此復彼羨陂奇景破眼起
勝遊到此安可止雲垂岳立翻壯觀渤澥終南疑卽是

龍編夾輔來庚辰篙工楫師不用勤須臾卅里席上過
從舟迴望猶紛紜翠微窈窕徑路別古松夾道披龍文
徑登絕頂攬全勝却望浮玉如浮雲江烟渺瀰色氤氳
遙界江海從東分興酣搖筆瀉滄溟直作雲夢八九吞
蔡邕作贊何足云焦先得之聞不聞

恭和

御製焦山古鼎歌和沈德潛韻

茫茫太古開蒙屯鼎彝作則垂後昆沉埋京口幾千載
光燄上燭搖乾坤權門豪效不可得寂寞古寺看猶存
海雲堂上爨兀立魑魅儵閃蛟螭躡往往精氣繞巖壁
就中恐有飛廉魂青碧駸蝕未缺處或露饕餮雲霄痕

中鑄五字類蚪蚪趨趨難爲言往來好事爭辨視
矜舌屈指不敢捫我

皇考古悉源委如探宿海尋崑崙商盤虞敦羅 內府
復有此鼎遺空門摩挲重寶合真鑿穆然法物存胚渾
重加拂拭鎮禪窟足令聲價增祗園昨宵呵護遣丁甲
一洗江霧山嵐昏周宣石鼓此其匹餘物瑣屑不足論
吁嗟宗器宜什襲置此恐被風雲吞八十一萬誠浪語
輦致何用千蹄奔帝歌有契契德元還排闥闕陳

天閣

恭和

御製自金山放船至焦山用蘇東坡韻

長江大觀良足耽金焦對峙浮天南東坡長韻窮險怪
描摹已得十二三黃龍捧舟

帝南狩鼉鼉馴擾連齧蠶吸噓元氣每有作踈縮潮海
俱懷慚金山昨夜一蹕高頂中冷不閉千尺潭焦先望
幸獻遙嶺八神前警形神酣幽岩曲徑各爭秀圖經幽
闕不得談已探金碧宿初地復賞蒼翠浮花龕品題妙
理尙本色伸此抑彼亦所甘華陽真逸有遺筆六十餘
字歐公貪

皇情懷古復高唱迨窘詰屈誰能堪拙哉蘇軾未觀海
當年應悔題禪巷

恭和

御製過常州府元韻

呂蒙城下走千艫七百平江繞郭紆驛口高樓都拱北
橋頭流水盡通吳臣居豈得稱廉讓鄙俗聊堪號朴愚
引領六飛曾過此望雲心事未能無

恭和

御製惠山聽松菴用竹爐煎茶因用明人題者韻卽書
王綬卷中

不愧菴居第二泉筠爐雅製待烹煎枯禪底事叅齋後
活火偏宜試雨前八德水邊真淨業九龍山外足高眠
舍人興到圖茶具四百年來卷帙全

幾餘偶此酌清泉古器摩挲特取煎聲沸自分叢竹外

烟輕從繞落花前高雲不礙山僧靜遲日還看野鹿眠
聞有金莖天上賜侍臣心跡最清全

恭和

御製汲惠泉烹竹爐歌元韻

惠山之泉古所聞水脉直與西京分從來品題本第一
中泠晚出茲爲羣俗客瓦鐺漫煮却忍令玉乳汚浮塵
當年陸羽或有見毀茶著論垂徵文山中老僧寶竒製
竹爐淨手含古芬聽松菴中煮茗室淨掃十笏當中陳
九龍山人老桑苧琉璃到眠夙所敦神來洒筆寫橫卷
承旨茶具茲傳薪軒轅道士詠石鼎斯圖題香尤紛紛
仲宣竹罌乃取酒宜乎冥沒無足云此爐四百年不朽

中有文筆持其權

巡方取供偶睹此并賞四卷能俱存親揮筠管作長句
頓覺爐竹霜斑新刮磨世寶比佛鉢爾作永鎮山門珍
留作永鎮山門珍試看天花墜處朝天人

恭和

御製鄧尉香雪海歌并命沈德潛和韻

梅花自笑非故吾新正未放含苞初東皇勒寒良有待
一翻風信原非誣陽春隨輦漏消息鄧尉一夜雲濤
舒茫茫漠漠望無際離冰懸瀑難描撫有時迴風澎湃
蕩枝起忽若潮頭噴沫超縈紆有時微雲綫懸籠樹側
復若晴漣呀呷循夷塗千苞萬榦紛插塢踰波疊浪相

追趨橫枝側出偶一瞥亦復霏霏玉屑飄舒徐馥郁掩
唼氣清烈香沁肺腑誠堪娛瑤池瓊島明月湖不若香
雪泛海稱名姝雲林十萬差可玩廣平一賦不足需何
爲青邱耽詩賞寂寞獨愛清影橫斜疎吐花發藻蘭
寶翰一洗寒谷空山孤白頭授簡誰許和春卿歸老家
居吳春卿歸老家居吳相如不愧爲大夫

恭和

御製過泰山作歌元韻

帝出乎震天地根萬物生長精氣存泰山配德嚮威仰
是謂青帝司乾坤西方大華與作對不數宿海推崑崙
昔年

東巡會上最高頂今來復此攀高巽摩挲八極發輿論
囊括四海包中原我

皇宏覽本無二禹迹茫茫盡翹企北過絕漠登興安兩
戒河山此津逮塗山玉帛不足廁竊疑周公作經記大
荒何得獨有怪譎離奇字皇哉

帝庸作譎舉可置試問七十二家記載然乎然可惜金
泥玉簡寂寞無人傳

恭和

御製登六和塔作歌元韻

高標跨空礙白日陽鳥回翅不得逸丹楹九級試一登
滄江翻波應清蹕六和名古夙所聞

憲皇鼎新續勝因莊嚴下鎮萬里浪窅兀上盡長空雲
海門風高秋不鎖百尺潮頭此平妥卽今春汛本安瀾
猶歷洪漣靖江左射潮亭子臨江前此塔復標龍從禪
江花江草塔外見拈來妙諦隨處然

恭和

御製錢塘觀潮歌元韻

曲江之濤古稱竒枚叔七發詳言之海螭噓吸妄言耳
水行應月理可思舊遊曾記依龕楮熟悉波濤眼中瀉

螺子步前屢繫舟西興隄上還騎馬

臣父曾任桐廬蕭山知縣兩邑皆瀕

江臣自幼隨任於此

江干塔影笑奔波朝上三山

塔名在桐廬縣

暮六和

長風大浪等閒遇惟畏潮起無知何潮頭澎湃猛無敵

曾破胥山千古魄幾回江上學乘潮落帆收櫓如矢激
初看白沫只兩三東風迅起無時淹倉皇失口呼未畢
聳身已在凌濤尖踰波前駛後復作長年嘯歌坐白若
腥風汨汨雲氣昏蛟龍掣舟白日索須臾振舵從東來
揚帆直破銀濤堆兩山雲樹走若電百道金鼓轟如雷
轟如雷聲殷砢礚百尺平添漲汪濊三郎廟下石漸平
拗怒西馳猶艾沛神魂夙昔驚騰掀宵中壘壘撐稜廉
弄潮輕薄古所戒怕讀長句慚蘇髯却觀

聖製轉快意耳中復有潮聲沸回思十載坐江頭手弄
烟波無一事潮來潮去何所爲人生萬事惟所隨疾雷
出雲同一氣似神而非聞之師

恭和

御製閱杭州旗兵元韻

玉帳牙旗天上列
金戈練甲日邊明
新成南國風雲陣
舊是東方子弟兵
七校熊羆儲上將
六師帷幄仰中衡
春蒐講武

仁皇典重聽車攻
懋衆情

恭和

御製和沈德潛山居雜詩十首元韻

吳下詢耆舊
春卿此卜居
千秋陸玩宅
今日杜陵廬
宦業湖山社
詩情雲水墟
春風行幄近
荒徑已教鋤
歲月窮經盡
詞華報國聞
人間推夙望
天上許斯文

一返春江棹三年日暮雲

聖情誠有眷雨露每遙分

山光全在屋門徑卽通溪修竹叢叢密幽禽樹樹啼俗
氛知自遠過客竟須迷應得耽禪悅怡情法喜妻

疏傳無人識還呼鄭子真好書如對客嘉樹便成隣夙
重伏生老寧同原憲貧和風隨杖履

天意錫私辰

文章酬晚達林壑遂初心地是吳王苑詩多洛社吟閒
中看鶴舞幽處任雲侵山路琴臺近春風好鼓琴

名山幽寂地娛老最相宜入望都堪壽消閒或訂醫茶
烟依榻處竹影上窗時几席圖書靜還堪自課兒

輕風范蠡口好上米家船坐待一湖月起看千樹烟春
深蒲自結寺遠磬猶傳應有孤吟意收來歸雁前

老謝賣書傭舍飴作阿翁詩壇延白社講席憶青宮弱
水身非遠蓬山夢自通鳳城連北斗不隔霧濛濛

扶杖趨行殿陳詩動

帝聽懸車仍賜精前席更橫經鶴唳從霄漢鴻飛豈杳
冥

恩章賁巖穴歡喜及山霧

苦詞曾鏤骨殊遇足鑄肝再仰雲霞麗真知天地寬傳
聞猶有愧身受或難安葑菲羣工意葵藿衷亦有丹

恭和

御製謁明太祖陵元韻

明祖當年奠八方園陵烟露冷如漿中原百戰先吳地
故里千秋近漢王他日黃圖同卜洛于今白馬尙歎商
聖人異代行殊禮社屋何須示禁防

恭和

御製洪澤湖元韻

洪澤廣無際呀呷連天池淮河千里間衆流歸網維往
往春水漲清黃交灌之長堤真天成彌望亘如絲蟻穴
或不戒頃刻萬甲馳高寶六七縣疆邑山嵯巉忍令魚
頭生汨沒洪濤堆

南巡親相視籌度拯其危從此慶底定吁嗟勞

睿思

壬申正月初十日

賜宴重華宮恭和

御製元韻

慚爲金闕掌書仙身到蓬池春色鮮
廣樂張時天穆若

綺筵陳處珮珊珊然擎來翠管重今日

乾隆十一年
宴瀛臺時臣官修

撰會和
製柏梁體詩

御吐遍銀花憶去年
溫室移茵坐長日
歸鞍

遮莫再三過

三徵十甲協佳辰喜說金穰歲在申
仙藻幸膺天上句

龍華真作會中人班隨宮鳥遲歸院
身比唐花早得春

深忝菲材叨異數吟箋惟有紀恩頻

恭和

御製上元燈詞元韻

雪晴又見月當空
彩勝幡飄乍試風
特許放燈酬令節
還排簫鼓報年豐

爆竹聲中萬彙舒
紅光朶朶燦芙蕖
唐家故事長春殿
銀燕金鳧定不如

舞隨燈影玉虹流
火齊天邊作絳樓
畫鼓一聲紅結陣
太平萬歲字當頭

一片晶明卽廣寒
樓頭香暖未更闌

慈寧宮裏扶輿出
無數祥光護

大安

頃刻花開不記巡火城中現
蕊珠人狼麁使者驚竒絕
也作笙歌隊裏人

百枝千炬儼浮圖拉雜聲還和
瑟竽小隊官衣擎舞出
玉龍天矯挾天吳

金錢百萬間吳綾買得元宵過
後燈宋時錢似進金錢綾綺買放十七十

八兩夜燈餘賞夙傳燕九節去歲南巡有觀燈詩御臣家舊事

恰相應

閒隨衢叟踏新年火樹光生處處
妍還憶往時行苑外

銀花影照錦連乾去年黃新庄行宮賜觀燈火

恭和

御製再詠玉躡元韻

天教弧矢壯丁男服習先從

萬乘諳弓影舊傳規合九環痕新結采成三別將圭璧
留佳製重與詩篇作美談一物足徵神武意要存溫潤
握中涵

香樹師引疾歸里詩以送之卽恭和

御賜詩元韻

退傅除新銜歸田錄舊作低徊鷓鴣踪迢遞雲山約夫
子翊昌期丹砂豈前諾維摩偶示疾精彩仍煥爍

優詔暫歸閒恩深知勿藥私心託桃李坐溯春風樂

恭和

御製賜和錢陳羣錦春園讌集用杜甫發秦州詩元韻

白鷗波茫茫養閒豈身謀還聞鴛湖外牋奏馳皇州望
闕值歲宴辭陛驚方秋伏想

聖人意眷此山中幽藥餌覓近市榛棘除荒疇

天意錫餘閒衣食非所求共憶祖帳時李郭會同舟黃
葉落遠郵重見平生遊招邀得地主應接亦頗稠名園
偶譙集觴咏銷煩憂一快達 九重

天笑竟爲收

賜餞夙有詩盛事藝苑畱忽看五雲藻又復傳螭頭城
也忝羣從昔別長河流樽酒白日暮雲樹蒼然浮

宸章今再賡

陳羣瀕行曾繪爲湖歸棹圖
并恭和 御賜詩元韻爲贈

寸心渺悠悠

恭和

御製癸酉正月二日瑞雪元韻

隔歲祥霽已再霑還隨春信又先單
瓣分梅蕊初開五片拂萸枝未長
三夜半東風雲勢重元日亥時立春
窗中西嶺

曉光含

天心應識祈年意特遣瓊田萬頃函

新正十日

賜宴重華宮聯句詠雪卽席恭和

御製元韻

霏霽優渥足春前快對新晴列綺筵
會到彤廷思昨歲重聽廣樂又今年
始和景物纔旬日難買風光是萬
錢最是上元相近處華燈當午亦鮮妍

次第和風出上林鶯聲作意與朋簪吟從雪霽春生句
恩並雲稠晝有陰擊壤欲同衢叟諺傾葵難答

聖人心廣歌近識

天顏喜雉尾徐開咫尺臨

恭和

御製釋奠

先師孔子元韻

璧水鸞旂儼降尊鼓鐘雷動萬靈奔東周日月光

清室北極星辰在魯門一席近分龍袞袖兩楹真奠

鳳凰樽心源息息羨牆見不獨於論足比論

恭和

御製中秋帖子詞元韻

秋宇澄輝靜夜間
太清微滓總須刪
明湖萬頃苑西路
十二玉樓三面山

望舒漫逞十分光
桂影空中未是香
天上新詞賡六疊

銀輪頓覺彩雲匡

是詩凡六
叠元韻矣

畫意吟情孰可師
詩須如畫畫如詩
慚無萬里滄州筆
寫出秋光滿液池

翹首晶瑩雲外樓
何曾高處不宜秋
年來月地容簪筆
吟徹蓬山最上頭

奉

敕題項聖謨摹韓滉五牛圖恭和

御製元韻

寢訛無改綠陰閒神采猶傳粉墨間比似蘭亭初榻本
不纖穠處用心艱

恭和

御製題蘇軾偃松圖元韻

虬龍蟠蟠欲千載是坡老心寒不改松烟滿紙題者多
探驪得珠幾人在勁節獨邀

聖主知一再展卷重有詩春陰漠漠來無倪和以白雪
松間吹

正月十六日

賜宴同樂園聯句申刻復

賜宴正大光明殿恭和

御製上元後一日小宴廷臣疊去歲元韻

乍陪鷺序液池前廣殿重開侍法筵桂發滿輪仍昨夜
冀飄一葉正新年七言迨窘羞臣朔十子才華愧姓錢
翹首 奎章雲日麗銀花火樹也分妍

三日春回滿上林花幡綵勝快同簪託身好竟分全樹
覓句艱知戀寸陰珍綺更叨

仁主澤卷蔬空抱小臣心泰交此際承

恩切日繞龍鱗近照臨

恭和

御製詠文木元韻

文木塞外古桐也

鳴春小草

卷一

六

不作東廂植翻從西域來枝猶中琴瑟紋竟象雲雷盤
錯沉埋古塵沙拂拭開青牛今想像紫鳳舊氍毹台伴
支離叟將同濩落材裁成荷

天眷繩削亦栽培

恭和

御製漢玉屏風歌元韻

古來重寶有真筌伊祈元解實左右咄哉漢玉古屏風
合伴文房之四友崑岡石裂白虹見玼璫璫襲非其偶
磨礪或用他山石雕琢不勞大匠手形質居然直方大
古光煜如丹汞走還應劍製自三代不徒漢室千年壽
含精孕彩天地全土蝕苔穿歲華久一朝拂拭邀

睿賞古鑑發光照妍醜紅霞結片潤以明金豆撒斑澤
而黜天生神物出有期處處靈巖翠微守精氣必騰龍
虎形瑤光上直旋杓斗空山無人委然笑點點星華飄
紫綬宣室今看佇隔風瀛洲何事膏爲酒

天葩朝燦玉屑飛旭日射屏驚滿牖上瑞同符紉纓歌
直是雙環有虞受木胎紙面香山詩朴陋惟堪迷物誘
摘毫深愧追琢章不但工書謝徐柳

恭和

御製宴都爾伯忒親王車楞郡王車楞吳巴什等於萬
樹園詩以紀事元韻

戎王韎鞞燦朝霞別苑筵開徧邇遐五月雪宮延颯爽

三霄露醕樂柔嘉石函甌脫開疆遠汗馬花賓錫貢加
八座薰風舞干羽綵旂微動見高牙

恩浹康居不敢驕羶車駝馬走遙遙金環貴將破弓至
毳帳名王折箭邀邦苾先期曾入衛呼韓全部盡歸朝
詞臣何事輕投筆好紀成功頌

帝堯

恭和

御製恭奉

皇太后啓蹕幸避暑山庄之作元韻

上

陵卜吉澤先覃五月東巡駕六驂駐蹕暫爾行殿七京自

師至燕河
凡七程
籌邊不假築城三雨過關口山容潤水漲灤

河土脉甘故事山莊傳避暑

大安和樂慶胥就

恭和

御製途中卽景元韻

屬車雷動儼天行
豹尾風翻趁曉晴
雲傍馬頭看不見
峯迴扇底壽初成
迎鑿旌旆山花發
夾路笙歌谷鳥鳴
向晚離宮傳止輦
旗門月上正盈盈

恭和

御製出口雜詠元韻

水激峯迴朔吹涼
長城萬里入蒼茫
百年定鼎關門近

天命於今信有常

避暑宮遙接九成關
頭笳鼓曉含情
浮橋直上看形勢
百曲湖河水正盈

萬峯高插碧芙蓉
處處平開千畝餘
溪雨常沾野人塊
山花爭傍

聖皇輿

塞草平鋪渾似球
鑿輿行處絕纖塵
自來北口防邊地
令作東都扶輦人

人家高下逐崔嵬
雲影嵐光半不開
滿耳濤聲清入聽
九松山合號徂徠

恭和

御製灤陽別墅元韻

別苑翠雲稠灤河去復留別來山向夕望處麥將秋當
暑娛清曠停鑿愛靜流
聖情仍樸素階土不教修

恭和

御製至避暑山莊日都爾伯忒白吉車楞等接見元韻
夾道降王迓

帝車一時勢面盡軒渠信徵戎土誰要我仁戴

天朝實活予貢賚共輸青玉椀

其俗入貢以玉椀盛葡萄爲敬

賜衣多

佩紫金魚豈唯候尉誇千里絕域從今屬象胥

恭和

御製駐蹕避暑山莊元韻

自昔卷阿

仁祖地

來遊今日景逾親
簾開湖外黃梅雨
山作簷前烏帽人
花柳不饒關口色
亭臺無減液池新
須知夏暑消民怨
豈獨清涼奉一身

恭和

御製清舒山館元韻

結構清幽倚山麓
望中晴雨總相宜
薰琴暗譜鳴階澗
湘箔輕翻晃柳絲
入座碧分巖草色
隔窗閒愛岫雲遲
果然天上招涼館
縱是圖成未敢窺

恭和

御製山莊燈詞八首元韻

暑散山莊塞宇空放燈如在上元中
覲光初接康居部應與朝正舊例同

萬點攢星燦五雲空中雷轉四山聞
鼓聲未駭紅初結火鳳銀龍各一羣

不知明月水精寒并對晴山火齊看
夜氣自澄天宇淨鏡光融徹錦輪團

初聞烟氣若燔蕭旋有霞光似建標
嘉會勝情都不減藕花風裏試燈宵

錦幄還垂五綵線蓮花合作九華燈
更看寶樹瓏瓏塔

鳴春小草

卷一

三

疑有琉璃界裏僧

烏泚亦登同樂苑素娥偏結蕊珠緣
已過仙艾靈絲節重頂傳柑撒荔筵

到來玉箬招涼地猶是金吾放禁宵
麗正門開千隊入山莊仍設正衙朝

魚龍曼衍畢紛陳歡洽終宵轉玉輪
好語西戎全入覲來同上國踏歌人

恭和

御製伏日元韻

暑館如皞秋炎官引車避人間
入伏日天上招涼地崇岡連曠朗
密景闕深邃荷清晨吹來林靜晚烟至樓臺

謝雕纈泉石表幽寄關門豁中外遐邇恩俱備登高望
塞限貨豈於地棄明堂開右个東巡茲展義

恭和

御製登四面雲山亭子元韻

結構據巔頂登臨路屈盤天風來四面物態豁千端不
上仙亭迴焉知塞宇寬歸雲低傍檻喬木俯依巒碧嶠
原無暑瓊樓或有寒最宜遊薄暮西嶺萬重丹

恭和

御製金蓮花元韻

不向池中映曉霞却疑布地有金沙紅蕖分譜凝粧別
黃菊先秋浥露斜塞外亦知迎佛日湖頭莫指是儂家

若教拈入兜羅手，應是維摩天女花。

恭和

御製荷元韻

猶是亭亭太液姿，賞從塞苑曉涼時。
乍驚暑薄開何早，翻似秋深落偶遲。
宵浦月明雲淡淡，朝軒日滿水差差。
結根漫道菰蘆近，長托清風答

睿思

恭和

御製熱元韻

涼燠斟酌元化寒，暄協土宜不惟調。
月令兼使順農期，火繖炎官惠黃雲。

聖主思還沾隨轡澤好雨信知時

恭和

御製荷露烹茶元韻

纒裳結蓋擧池荷騷人遺韻韻事多烹茶乃取葉上露
此事幽絕無能過碧筒吸酒做不得麥飯尊羹俗飲食
漫將白黑較墨光焉用清涼分水德初開蠓眼仍跳珠
荷香不散雲漿腴江南桑苧休著書且看沆瀣翻仙髓
品泉毋乃多事乎